

Inatsisartunut ilaasortaq
Per Berthelsen

KIIP-imi kalaalinngorsaaniisaq pillugu apeqqutip malitseqartinneqarnisaa

Akissummut ilagitillugit innersuussutigaa akka apeqquteqaatini siullerni akissutigisama imareriigaat isummamik tunngaviusunik ilaqarmata, taakkulu ilaatigut ukuupput:

Kalaallisut oqaatsivut nunatsinni tunngaviupput tamatigullu Kalaallit Nunaanni pingaarnersaallutik oqaasiusussaapput. Oqaatsit pillugit politikki erseqqissoq naalakkersuisut pilersissavaat. Pisortaqarnikkut ingerlatsinermi pisortat ingerlatsivini tamani inuiaqatigiit pisariaqartitaannut naleqqussarnej ingerlanneqassaaq ilaatigut makku siunertaralugit:

- Pisortaqarnikkut ingerlatsinerup annikillisaaviginissaa
- Kalaallinik ilinniarsimasunik sulisoqarnerulernissaaq
- Atorfinitsitsinermi piumasaqaatinik naleqqussaaneq
- Sulisorisat kalaallisut oqaaseqanngitsut kalaallisut ilinniarnissaannut periarfisiinissat
- Akulerutsitsiniarnermi politikki.

Upernaaq manna Inatsisartut ataatsimiinnerminni Avannaamioqatigiit Oqaatsit pillugit Isumaqaatigiissutaat (Nordisk Sprogkonvention) akuersissutigaa. Avannaamioqatigiit Oqaatsinut politikkimik Nalunaarutaatissaattut missiliuut (Udkast til Deklaration om Nordisk Sprogpolitik) maanna tusarniaassutigineqareerluni akuersissutigineqarnissaa aamma qanillivoq.

Oqaatsivut maanna inissisimalerput tassaallutik nunap pisortatigoortumik oqaasii, tamanna aamma Namminersorneq pillugu Isumalioqatigiissitani erseqqissarneqareerpoq.

Upernaaq manna Inatsisartut oqaluuserisaanni partiip Siumup siunnersuutaa malillugu aamma akuunerulersitsinissamik siunnersuut akuerineqarpoq, upernaaq mannalua piaartumik suleqatigiissussanik Naalakkersuisut inuttaliisussaapput aappaagu saqqummiussaqaartussanik.

Taakkua sulinissaanni pingaartinneqarpoq oqaatsit atugaasut oqimaaqatigiimmik pissuseqarnissaaq siunertaralugu naligiimmik isigineqarnissaat, tassa oqaatsit kinguussaasimasutut taaneqarsinnaasut annertunerusumik suliniarfiginissaat, aamma pisortaqarnermi inuttaqartitsineq eqqarsaatigalugu. Tassani ikinnerussuteqartut

10. juni 2006
J.nr. 02.23-00032
Dok nr.173906
Postboks 1029
3900 Nuuk
Oq/tel +299 34 50 00
Fax +299 32 20 73
Kiip@gh.gl
www.nanoq.gl/kiip

pisinnaatitaaffii aamma ataqqillugit iliuuseqartoqassaaq. Taassuma kingunissaasa suliniutiginissaat nalilersukkamik suleqatigiit taakku siunnersuuteqarfigissagaat isumaliutigaara. Ilangullugu isumaliutigisassanut ilaavoq marlunnik oqaaseqareersut sulisorinerini periarfissat suut pitsannguutaassasut.

Sulisorisat ilinniartinnissaannut tunngasuni pisorta qarfiit kommunillu isumaqatigalugit iliuuseqarnissat pisariaqarput, tassaniimmata periarfissat allatut ittut qanoq atorneqarsinnaanissaannik isumasiorfiginninnissat. Taamatut iliuusissani aamma nalilertariaqarpoq kommuunit aaqqissuuteqqinnissaata periarfissat suut saqqumerumaarnerai.

Ilinniutit eqqarsaatigalugit taareersinnaavara Oqaatsinik Pikkorissarfiup allamiutut oqaasilinnut kalaallisut ilinniutissat nutaat maanna ingerlammagit, ingerlateqqinnissaanilu Oqaasileriffiup qarasaasiarsorneq atorlugu periarfissat aammaassai aamma qissimigaarneqassallutik.

Danmarkimi Namminersornerullutik Oqartussat sinniisoqarfiani KIIP-ip immikkoortotaqarfiani siunnerfigineqarpoq sulisoq ataasiinnangussasoq, sulisut marluk Nunatsinnut nuunnissamik neqeroorfigineqassapput, atorfiillu marluk atorunnaasapput.

Ikinngutinnersumik inuulluaqqusillunga

Doris Jakobsen
Naalakkersuisunut ilaasortaq